

四庫全書

集部

欽定四庫全書

宋元詩會卷六十七

兵部主事陳焯編

元好問

下

送曹吉甫兼及通甫

意氣羨君豪  
憐君屈騎曹  
安能事筆硯  
且復混弓刀  
風雪貂裘暗  
關山馬骨高  
南飛見鴻雁  
應為惜哀勞

并州聞雁

八月并州雁清汾照旅羣一聲驚晚笛數點入秋雲滅  
沒樓中見哀勞枕畔聞南來復北去無計得隨君

甲寅十二月四日出鎮陽寄宰魯伯

潯水曉光動灞橋詩境同衝寒騎瘦馬認影識衰翁長  
岸風聲外孤城雪意中回頭歌笑處淒絕意何窮

陽翟道中

長路伶俜裏羈懷莽蒼中千山分落照萬籟入秋風頻  
見參旗縮虛傳朔幕空故園歸未得細問北來鴻

月觀追和鄧州相公席上韻

月觀知名舊池亭發興偏露涼驚夜鶴風細咽秋蟬綠  
泛兵厨酒紅依幕府蓮無緣逐清景空羨飲中仙

方城道中懷山居

枝拙違時用年饑與食謀江山貧士歎日月賈胡留楚  
客頻招隱文園故倦遊衡門有幽事還我北窗幽

勝槩

勝槩烟塵外新詩杖履間偶隨流水去澹與白雲還吾

道三緘口時情一解顏從今便高卧已負半生閒

少室南原

地僻人烟斷山深鳥語譁清溪鳴石齒暖日長藤芽綠  
映高低樹紅迷遠近花林間見雞犬直擬是仙家

長壽新居

地古村墟迥川迴縣郭斜蒲池餘老節菊水引新芽卜  
築欣成趣歸耕覺有涯迎門顧兒女今日是山家

寄程錫鐵安

御史陰功在孫兒玉不如已能騎竹馬想亦愛銀魚異  
縣關山濶衡門骨肉疎幾時隨阿舅盡讀外家書

己亥元日

五十未全老衰容新又新漸稀頭上髮別換鏡中人野  
史纔張本山堂未買隣不成騎瘦馬還更入紅塵

發濟源

早暎今年劇他鄉底處歸贏糧先失具涉世本無機棄  
擲烏皮几裊徊白版扉殷勤雙語燕媿汝遠相依

倪莊中秋

強飲日逾瘦，袂衣秋已寒。  
兒童謾相憶，行路豈知難。  
露氣入茅屋，溪聲喧石灘。  
山中夜來月，到曉不曾看。

送田益之從周帥西上

市近厨無肉，書香蠹有蟲。  
深居誰不樂，兀坐竟何功。  
天日伸眉後，江山洗眼中。  
蓬萊如可到，剩借玉川風。

庚子三月十日作

殘夢忘書帙，餘寒殢酒杯。  
青銅元懶照，白紵更寬裁。  
水

際時獨往花邊知幾回殷勤雙語燕應自謝家來

春日

里社春盤巧欲爭裁紅暈碧助春情忽驚此日仍為客  
卻想當年似隔生貧裏盡鹽憐節物亂來歌吹失歡聲  
南州剩有還鄉伴戎馬何時道路清

葉縣雨中

春旱連延入麥秋今朝一雨散千憂龍公有力迴枯槁  
客子何心嘆滯留多稼即看連楚澤歸雲應亦到崧丘



兵塵浩蕩乾坤滿未厭明河拂地流

秋懷

涼葉蕭蕭散雨聲虛堂浙浙掩霜清黃華自與西風約  
白髮先從遠客生吟似候蟲秋更苦夢和寒鵲夜頻驚  
何時石嶺關頭路一望家山眼暫明

橫波亭

孤亭突兀插飛流氣壓元龍百尺樓萬里風濤接瀛海  
千年豪傑壯山丘疎星澹月魚龍夜老木清霜鴻雁秋

倚劍長嘯一杯酒浮雲西北是神州

懷益之兄

牢落關河雁一聲干戈滿眼若為情三年浪走空皮骨  
四海相望只弟兄黃耳定從秋後到白頭新自夜來生  
西樓日日西州道欲賦窮愁竟不成

會善寺

白塔沉沉插翠微魏家宮闕此餘基人生富貴有遺恨  
世事廢興無了期勝槩只今歸鷺嶺烟花從昔繞龍墀

長松想是前朝物及見諸孫賦黍離

西齋夜宴

飄零無物慰天涯酒伴相逢飲倍加  
誤謬君當略彭澤回旋我亦笑長沙  
金釵醉舞迎春髻銀燭光搖半夜花  
只欠東山游錄事不來堅坐看紛譁

送吳子英之官東橋且為解嘲

柴車歷鹿送君東萬古書生蹭蹬中  
良醞暫留王績醉新詩無補玉川窮  
駒陰去我如決驪蟻蛭與誰爭長雄

快築糟丘便歸老世間馬耳過春風

京居辛卯八月六日作

四壁秋蟲夜語低南窗孤客枕頻移野情自與軒裳隔  
旅食難堪日月遲平子歸田元有約魏舒襍被恐無期  
一莖白髮愁多少慚愧家人賦屢房

壬辰十二月即事二首

萬里荆襄入戰塵汴州門外即荆榛蛟龍豈是池中物  
蟣虱空悲地上臣喬木他年懷故國野烟何處望行人

秋風不用吹華髮  
滄海橫流要此身

五雲宮闕露盤秋  
銀漢無聲桂樹稠  
複道漸看連上苑  
戈船仍擬下揚州  
曲中青塚傳新怨  
夢裏華胥失舊遊  
去去江南庾開府  
鳳凰樓畔莫回頭

癸巳四月二十九出京

塞外初捐宴賜金  
當時南牧已駸駸  
只知灞上真兒戲  
誰謂神州遂陸沉  
華表鶴來應有語  
銅槃人去亦何心  
興亡誰識天公意  
留着青城閱古今

宋亡於青城而  
金亦亡於此

喜李彥深過聊城

圍城十月鬼為隣，異縣相逢白髮新。  
恨我不如南去雁，羨君獨是北歸人。  
言詩匡鼎功名薄，去國虞翻骨相屯。  
老眼天公只如此，窮途無用說悲辛。

秋夕

小簾涼多睡思清，一窗風雨送秋聲。  
頻年但覺貂裘敝，萬古何曾馬角生。  
寄食且依嚴尹幕，附書誰往鄧州城。  
澆愁欲問東家酒，恨殺寒雞不肯鳴。

淮右

淮右城池幾處存  
宋州新事不堪論  
輪車謾欲通吳會  
突騎誰當擣薊門  
細水浮花歸別澗  
斷雲含雨入孤村  
空餘韓渥傷時語  
留與纍臣一斷魂

望王李歸程

一褐霜寒晚思孤  
難中行李見歸途  
虞卿仲子死不朽  
石父晏嬰今豈無  
義士龍沙元咫尺  
纍臣駒隙自舒徐  
何時斗酒歡相勞  
驚看燕家頭白烏

杏花落後分韻得歸字

懶髓能醫病頰肥  
鷺膠無那片紅飛  
殘陽淡淡不肯下  
流水溶溶何處歸  
煮酒青林寒食過  
明妝高燭賞心違  
寫生正有徐熙在  
漢苑招魂果是非

送輔之仲庸還大梁

驂騑爭道渺翩翩  
誰遣風塵失壯年  
四壁舊聞縣磬宅  
一囊今有賣書錢  
淋浪別酒青燈夜  
滅沒孤帆落照邊  
想得還家過春半  
故山喬木滿蒼烟



繡江汎舟有懷李郭二公

荷花如錦水如天  
狼籍秋香擁畫船  
長白風烟最瀟灑  
外臺賓主重留連  
勝遊每恨隔千里  
樂事便當論百年  
咫尺西州兩詩客  
不來同作飲中仙

寄欽止李兄

征車南北轉秋蓬  
關塞相望兩禿翁  
袞袞便當隨世路  
悠悠難復倚天公  
銅駝荊棘十年後  
金馬衣冠一夢中  
尊酒雲州古城下  
幾時攜手哭春風

望崧少 二首

崧少飛來崑閬山山家茅屋翠微間雞豚鄉社相勞苦  
花木禪房時往還結習尚餘三宿戀殘年多負半生閒  
長河一葦人千里望斷西城碧玉環

飲鶴池邊萬木稠  
蒼龍崖上五峰秋  
藤垂絕壁雲添潤  
澗落哀湍雪共流  
田父占年驚玉斨  
詩仙留迹嘆崑丘  
西風落日山陽道  
空對紅塵憶舊遊

野谷道中懷昭禪師

行行汾沁欲分疆  
漸喜人聲挾兩鄉  
野谷青山空自繞  
金城白塔已相望  
湯翻豆餅銀絲滑  
油點茶心雪藥香  
說向阿師應被笑  
人生生處果難忘

外家南寺

在至孝社予兒時讀書處也

鬱鬱秋梧動晚烟  
一庭風露覺秋偏  
眼中高岸移深谷  
愁裏殘陽更亂蟬  
去國衣冠有今日  
外家梨栗記當年  
白頭來往人間徧  
依舊僧窗借榻眠

追賦定襄周帥夢卿家秋日牡丹

千古吳中富貴家秋風吹送洛陽花真妃鏡裏春難老  
玉女車邊日易斜紀瑞定誰增舊譜換根原自有靈砂  
來遲不及西堂宴猶想分香入棣華

周有棣  
華堂

### 寄楊飛卿

客夢悠悠信轉蓬  
藥牀殷殷動晨鐘  
西風白髮三千丈  
故國青山一萬重  
沙水有情留過雁  
乾坤多事泣秋蟲  
三間老屋知何處  
慚愧雲間陸士龍

### 雨夜

夢裏孤蓬雨打秋茅齋元更小於舟無錢正坐詩作祟  
識字重為時所讐千里謾思黃鵠舉六年真作賈胡留  
并州北望山無數一夜砧聲人白頭

哀賢詩三首

赤縣神州坐陸沉金湯無粟禍侵尋當官避事平生恥  
視死如歸社稷心文采是人知子重交朋無我與君深  
悲來不待山陽笛一憶同衾淚滿襟

李欽叔

冀都事死東州禍李翰林亡陝府兵方為騷人箋楚些

更禁書客墮秦坑石苞本不容孫楚黃祖安能貸禰衡  
同甲四人三橫實此身雖在亦堪驚

李長源

太學聲華弱冠馳青雲岐路九霄飛上前論事龍顏喜  
幕下籌邊犬吠稀壯志相如頭碎柱赤心嵇紹血沾衣  
從來聖牘褒忠義誰為幽魂一發揮

王仲澤

### 雪晴作

晴光晃漾入危闌萬象都歸一色看搖筆尚堪凌浩蕩  
舉杯誰與慰荒寒化成銀界清涼近散盡冰花碧海乾

後夜霜空月輪滿可無秦女共驂鸞

過應州

平野風埃接戍樓邊城三月似窮秋人家土屋纔容膝  
驛路旗車不斷頭隨俗未甘嘗馬湏敵寒直欲御羊裘  
十年紫禁烟花繞此日雲山是應州

華不注山

濟南作

元氣遺形老更頑孤峰直上玉孱顏龍頭突出海波沸  
鰲足斷來天宇閑齊國伯圖殘照裏謫仙詩興冷雲間

乾坤一劍無人識  
夜夜光芒北斗寒

送周帥夢卿之關中

風華漠漠水迢迢  
長記金鞍入灞橋  
鬚鬢而今滿霜雪  
羽毛此日是雲霄  
火餘函谷青猶峙  
春動長陵紫未消  
射虎南山付公等  
可能仙掌不相招

十月二十日雪中過石嶺關

老天黯慘入平蕪  
朔吹崩奔萬竅呼  
雪意旋粧行路景  
詩家新有入關圖  
地爐圍坐慚田父  
絮帽衝寒怨僕夫



故國烟花重迴首蜀橙山麝記金壺

燕府白兔

仙穎迷離望莫攀爭教失腳下高寒吸殘灝露瑤窗曉  
搗盡玄霜玉杵閒顧影乍疑雲外見寫生何似鏡中看  
褐衣擾擾皆三窟幾在闕經咳唾間

出都二首

漢宮曾動伯鸞歌事去英雄可奈何但見觚稜上金爵  
豈知荆棘卧銅駝神仙不到秋風客富貴空悲春夢婆

行過盧溝重回首鳳城平日五雲多

歷歷興亡敗局碁登臨疑夢復疑非斷霞落日天無盡  
老樹遺臺秋更悲滄海忽驚龍穴露廣寒猶想鳳笙歸  
從教盡刻瓊華了留在西山儘淚垂

壽寧宮有瓊華島  
絕頂廣寒近為黃

冠輩  
所撒

過三鄉望女兒村追懷溪南詩老二首

雲際虛瞻處士星案頭多負讀書螢筆端有口傳三篋  
石上無禾養百齡從昔葛陂終變滅祇今韓嶽謾英靈

因君重為前朝惜枉破青衫買一經

女凡山人  
謂之韓嶽

萬山青繞一川斜好句真堪字字誇棄擲泥塗豈天意  
折除時命是才華百錢卜肆成都市萬古詩壇子美家  
欲就溪南問遺事不禁衰涕落烟霞

寄劉繼先

清霜茅屋耿無眠坐憶分攜一慨然楚客登臨動歸興  
謝公哀樂感中年淒涼古驛人烟外迤邐荒山雪意邊  
千樹春風水楊柳待君同繫晉溪船

為鮮于彥魯賦十月菊

清霜浙浙散銀沙驚見芳叢閱歲華  
借暖定誰留翠被鍊顏應自有丹砂  
秋香舊入騷人賦晚節今傳好事家  
不是西風苦留客衰遲久已避梅花

別周卿弟

晚歲論詩辱見收相從許久重相留  
苦心亦有孟東野真賞誰如高蜀州  
萬疊寒雲度歸雁孤洲春水澹沙鷗  
荒城後日思君處風色蕭蕭人白頭

追錄洛中舊作

樂府新聲綠綺裘  
梁州舊曲錦纏頭  
酒兵易壓愁城破  
花影長隨日脚流  
萬里青雲休自負  
一莖白髮儘堪羞  
人間只怨天公了  
未便天公得自由

晉溪

石磴雲松着色屏  
岸花汀草展江亭  
青瑤疊甃通縣甕  
白玉雙龍掣迅雷  
地脉何嘗間今昔  
尾閭真解泄滄溟  
乾坤一雨兵塵了  
好就川妃問乞靈

七月十二日行狼牙嶺

狼牙路滑馬伶俚，老鶴迢迢欲上征。  
一曲松風寫幽致，九秋雲物愴離情。  
天開員嶠方壺境，澗落銀河月窟聲。  
覲面青山入渠手，定誰胸次玉崢嶸。

答定齋李兄

小山藂桂姓名香，舉世何人得雁行。  
滄海揚塵幾今昔，長庚配月獨淒涼。  
虛勞裴相求白傅，正倚源明識漫郎。  
十載相從未言晚，城南泉石有雲莊。

聽姨女喬夫人鼓風入松

白雪朱絃一再行  
春風纖指十三星  
雲窗霧閣有今昔  
寶靨羅裘無此聲  
瀟灑寒松度虛籟  
悠颺飛絮攪青冥  
胎僊不比湘靈瑟  
五字錢郎莫漫驚

寒食

上苑春風盛物華  
天津雲錦赤城霞  
輕舟矮馬追隨遠  
翠幕青旗笑語譁  
化國樓臺隔瀛海  
吳兒洲渚記仙家  
山齋此日腸堪斷  
寂寞銅餅對杏花

送樊順之

弓刀十驛岳蓮州渭水秦山得意秋  
王粲從軍正年少  
庾郎入幕更風流  
寒鄉况味真雞肋  
清鏡功名屬虎頭  
寄謝溪風亭上月老夫乘興欲西遊

蜀昭烈廟

合散扶傷老益堅  
荒祠重過為淒然  
君臣灑落知無恨  
庸蜀崎嶇亦可憐  
一縣山陽堯故事  
三年章武魏長編  
錦宮羽葆今何處  
半夜樓桑叫杜鵑



贈王仙翁道成

覽照休驚白髮新奕棋翻覆見來頻  
燕南趙北留詩卷  
王後盧前盡故人  
平地青雲一爐藥  
舊都喬木百年身  
憑君剩醉浮香酒

館名

梁苑而今不算春

趙汲古南園

林園近與六街隣  
塵漲都歸一水分  
魚樂定從濠上得  
荷香偏向雨中聞  
接籬倒着容山簡  
老屋高眠稱陸雲  
尊酒相陪有今日  
却慚詩壘不能軍

送曹幹臣

和林音驛日懷思  
燕市歌歡有此時  
老我真成鐵爐步  
感君時送草堂貲  
黃楊舊厄三年閏  
赤驥非無萬里姿  
平地烟霄付公等  
不妨閒和鳳池詩

人日有懷愚齋張兄緯文

書來聊得慰懷思  
清鏡平明見白髭  
明月高樓燕市酒  
梅花人日草堂詩  
風光流轉何多態  
兒女青紅又一時  
澗底孤松二千尺  
殷勤留看歲寒枝

高少府瀍陽後庵二首

溪上弄明月風露發新警  
心空無一塵萬竹掃秋影  
一水隨人意蔬畦復芋溝  
風波河洛近莫放出山流

山居雜詩四首

瘦竹藤斜挂幽花草亂生  
林高風有態苔滑水無聲  
石潤雲先動橋平水漸過  
野陰添晚重山意向秋多  
樹合秋聲滿村荒暮景閒  
虹收仍白雨雲動忽青山  
川迴楓林散山深竹港幽  
疎烟沉去鳥落日送歸牛

巨然秋山圖

筆端游戲三昧物外平生往還為問阿師何在白雲依  
舊青山

曹得一扇頭

機中秦女仙去月底梅花晚開只見一枝疎影不知何  
處香來

無題

二首

七十鴛鴦五十絃酒薰花柳動春烟人間只道黃金貴

不問天公買少年

春風也解惜多才  
嫁與桃花不用媒  
死恨天台老劉阮  
人間何戀卻歸來

俳體雪香亭雜詠

九首

洛陽城闕變灰烟  
暮號朝虞只眼前  
為向杏園雙燕道  
營巢何處過明年

醇和坊近洞房環  
碧瓦參差竹木閒  
批奏內人輪上直  
去年名姓在窗間

天上三郎玉不如手中白雨趣花奴御屏零落宣和筆  
留得華清按樂圖

金縷歌詞金屈卮百年人事鬢成絲重來未必春風在  
更為梨花住少時

琵琶心事曲中論曾笑明妃負漢恩明日天山山下路  
不須回首望都門

羅綺深宮二十年更持桃李向誰妍人生只合梁園死  
金水河頭好墓田

苦才多思是春風偏近騷人惆望中啼盡杜鵑枝上血  
海棠明日更應紅

暖日晴雲錦樹新風吹雨打旋成塵宮園深閉無人到  
自在流鶯哭暮春

暮雲樓閣古今情地老天荒恨未平白髮累臣幾人在  
就中愁殺庾蘭成

西園

百草千花雨氣新今朝陌上有游塵皇州春色濃於酒

醉殺西園歌舞人

鴛鴦扇頭

雙宿雙飛百自由  
人間無物比風流  
若教解語終須問  
有底愁來也白頭

杏花雜詩四首

杏花牆外一枝橫  
半面宮妝出曉晴  
看盡春風不回首  
寶兒元自太憨生

西山漠漠有無中  
幾日園林幾樹紅  
燕子銜將春色去



錯教人恨五更風

楚客離魂不易招  
野春平碧水迢迢  
垂楊也被多情惱  
瘦損春風十萬條

魏紫姚黃有重名  
洛陽車馬鬧清明  
吹殘桃李風纔定  
可是東君別有情

感興

好句端如綠綺琴  
靜中窺見古人心  
陽春不比黃華曲  
未要千人作賞音

從希顏覓篤耨香

綠洋奇品賽濃梅永憶薰爐試淺灰尤物也知人愛惜  
簾篩風動只縈回

自題中州集後

五首

鄴下曹劉氣儘豪江東諸謝韻尤高若從華實評詩品  
未便吳儂得錦袍

陶謝風流到百家半山老眼淨無花北人不拾江西唾  
未要曾郎借齒牙

萬古騷人嘔肺肝乾坤清氣得來難詩家亦有長沙帖  
莫作宣和閣本看

文章得失寸心知千古朱絃屬子期愛殺溪南辛老子  
相從何止十年遲

平世何曾有稗官亂來史筆亦燒殘百年遺稿天留在  
抱向空山掩淚看

樂天不能忘情圖

二首

得便宜是落便宜木石痴兒自不知就使此情忘得了

可能長在老頭皮

芙蓉脂肉紫霞凝別是仙家暖老方只枉柳枝拚下得  
忘情一馬亦何妨

送子微

古來何物是經綸一片青山了此身亂後洛陽花木盡  
不妨閒作水南人

從鄧州相公覓酒時在鎮平

寒日山城雪四圍空齋孤坐意多違江洲未覺風流減

可使陶潛望白衣

雜著 四首

太虛空裏一游塵造物雖工未易貧  
臧獲古來多鼎食可能夷叔是饑人

天上河源地上流黃金浮世等閒休  
埋愁不著重泉底儘向人間種白頭

昨日東周今日秦咸陽烟火洛陽塵  
百年蟻穴蜂衙裏笑殺崑崙頂上人

半紙虛名百戰身轉頭高塚卧麒麟山間曾見漁樵說  
辛苦凌烟閣上人

四皓圖

身墮安車厚幣中白頭塵土浣西風當時何不山間老  
羽翼區區有底功

解嘲

鴈後花前日日閒頗思尊酒慰愁顏憑君細數東州客  
誰在紅紅綠綠間

杜生

杜生絕藝兩絃彈  
穆護沙詞不等閒  
莫怪曲終雙淚落  
數聲全似古陽關

東山

自笑平生被眼謾  
看山只向畫中看  
天公老筆無今古  
枉着千金買范寬

喬夫人墨竹

萬葉千梢下筆難  
一枝新綠儘高寒  
不知霧閣雲窗晚

幾就扶疎月影看

銅雀臺瓦硯

愛惜鉛華洗又看  
畫欄桂樹雨中寒  
千年不作鴛鴦去  
博得書生笑老瞞

郝經

字伯常其先潞州人徙澤州家世業儒祖天挺元  
好問嘗從之學金末父思溫避地河南之魯山其  
母匿窖中亂兵以火熏灼之死矣經用窖和寒菹  
汁決母齒飲之即蘇時經九歲人皆歎異金亡徙  
順天居五年為守帥張柔賈輔所知延為上客二  
家藏書皆萬卷經博覽無不貫通憲宗元年世祖



以皇弟開邸金蓮川召經詢以治道條上數十事  
遂留王府是時連兵於宋經力陳宋無敗亡之譽  
王不宜空國而出宜修德俟時因進七道議七千  
餘言憲宗在蜀師久無功復勸世祖稟命行在遣  
使喻宋示以大信許其割地納質暫與和好明年  
世祖即位以經為翰林侍讀學士佩金虎符充國  
信使告即位於宋而王文統用事嫉經之能陰屬  
李壇潛師侵宋欲假手害經及經入境宋果疑經  
又賈似道方以卻敵為功恐經至謀泄竟館經於  
真州經上表宋帝及上書宰執皆不報羈宋十六  
年日以著述為事迨伯顏南伐問執行人之罪宋  
懼始以禮送經歸明年夏至闕錫燕大廷賞賚有  
差秋七月卒年  
五十三諡文忠

## 巴陵女子行

乙丑秋九日王師渡江大帥巴圖自鄂渚以一軍覘  
上流遂圍岳岳潰入于洞庭俘其遺民以歸節婦巴  
陵女子誓不辱于兵書詩衣帛見意赴江而死其自  
叙曰巴陵女盧希孟魏公五世孫歸于尚書賈公之  
男璠岳州破被獲之明日以衣帛書詩願好事君子  
知吾宋家有節婦者其詩悲婉激切有漢魏風如天  
果喪中原大似裂冠衽退鷁落迅風孤鸞弔空影簪  
堅折白玉瓶沈斷青綆妾死志不移改邑不改井我

本瑚璉器安能作溺皿借此清江流葬我全首領皇  
天如有知定作血面請願魂化精衛填海使成嶺數  
百言余既高希孟之節且悲其志作巴陵女子行

北來諸軍飛渡江笑騎一夜滿岳陽樓頭火起入閭巷  
曹伍偶走如牛羊巴陵女子尚書婦生平不識門前路  
亂兵騎出勢倉皇夫婿翁姑在何處吞聲忍淚行且啼  
啼痕沾濕越羅衣此身忍使人再辱裂帛暗寫臨終詩  
上言社稷安危事下說投江誓天志一回宛轉一悲辛

心折魂飛不成字詩成淚盡赴江流蛾眉蕭颯天為愁  
芙蓉零落入秋水玉骨直葬青海頭古來烈婦才一二  
誰似巴陵妙文理名與長江萬古流丞相魏公還不死

蜀亡歎

蜀破後有唐仲明者子西孫也被俘  
鬻於燕市安陸趙仁甫鳩貨贖之

子規啼缺峨眉月嘉陵江中半江血青天蜀道為坦塗  
馬蹄蹴落陰山雪芙蓉城碎朔風急虓虎磨牙綺羅穴  
不識兵戈三百年疊鼓一聲肝膽裂坡仙故里子西孫  
挺身北走來中原峨岷秋色橫眉宇骭髀獨倚燕市門

時望蘇門一迴首漠漠萬里烟塵昏古言蜀險甲天下  
一夫扞禦足成霸前劉後李王復孟虎視中原雄並駕  
于今底事谷為陵錦城萬里趨龍庭當時不與秦塞通  
一天自可延千齡吾子莫漫嗟飄零厲階權輿實五丁

太平頂讀秦碑

岱宗太平頂磨崖與天齊左勒聖后頌右刻張說辭文  
采與書法不離近代規漢封宛在周觀東秦壇夏出絕  
頂西壇前圓平值中峰突兀上有始皇碑年深雨漬百

裂餘圻作兩峰蹲半龜面陽數字仍可辨隙縫重銜苔  
蘚皮中間隱約見制可完好堪辨惟臣斯拳如釵股直  
如筋屈鐵碾玉秀且奇千年瘦勁益飛動迴視諸家肥  
更癡當時風雨有餘怒豈容跨石獨在茲祇應神明愛  
尤物不肯轟擊常護持昔年韓文公曾賦岫嶠詩字青  
石赤皆傳聞漫為咨嗟涕漣漉何如親登泰山日觀峰  
光怪特見絳氣纏金虹摩挲細讀秦相碑天門高詠來  
清風乃知山靈不相負夜宿天邊不忍去醉倚雲窗重

回顧

前聽角行

此在蜩殼菴  
賦贈趙仁甫

漢家有客北海北  
節毛落盡頭毛白  
聽此空令雙淚垂  
中原雁斷無消息  
南枝越鳥莫驚飛  
牢落天涯永相失  
江上舊梅花  
今夜落誰家  
樓頭有恨知何事  
牽住晴空  
幾縷霞

後聽角行

此宋咸淳癸酉  
被留儀真作

燕南壯士江城客  
孤館無眠心已折  
那堪夜夜聞角聲

怨曲悲涼更幽咽一噴牽殘楊柳風五更吹落梅花月  
霜天裂卻浮雲散雁行斷盡疎星接餘音眇眇渡江去  
依俛似向愁人說勸君且莫多嘆嗟家人恨殺生離別  
可憐辛苦為誰來凋盡朱顏頭半白萬緒千端都上心  
一寸肝腸能幾截當時聽角送南人南人吹角不送人  
不如睡着東風惡歌枕江聲總不聞

奉使被留

重圍雨久塌莓苔火鋪喧呼著棘栽唯有東風難禁約



隔牆吹過落花生

坊刻誤作王立中詩蓋因郝伯常被留儀真其所吟咏皆為安豐教授王

時中藏錄以傳後人遂譌王作乃時中又譌立中不可不知

### 館人供雁

持節江頭久食魚  
館人供雁意踟躕  
呼兒細看雲間足  
恐有中原問訊書

### 放雁北還繫書於足

零落風高縱所如  
歸期迴首是春初  
上林天子援弓繳  
淮海羣臣有帛書

按宋咸淳癸酉郝伯常充信使被賈似道羈留儀真已十五年時有以生

雁饋者伯常因作詩繫其足縱之北還是年冬巴延南  
伐賈似道懼甚命總管段祐送伯常歸國明年三月虞  
人始獲此雁於汴梁金明池

## 巴延

蒙古巴林部人自曾祖燕魯克圖事太祖為其部  
左千戶祖與父皆世其官至元初入事世祖見巴  
延儀貌大奇之預謀國事恒出廷臣右衆服曰真  
宰輔也十一年大舉伐宋能以不殺定江南時論  
方之曹彬誠為不愧先是宋末童謠云江南若破  
百雁來過莫有喻其意者及宋亡始知為識藝林  
載三詩相傳巴延下江南時所作皆健爽可誦然  
考元史本傳未嘗言其讀書知文字吟籍既收君  
子存之而已

下江南詩

劍指青山山欲裂馬飲長江江欲竭  
精兵百萬下江南  
干戈不染生靈血

題馬鞭

一節高來一節低幾回敲鐙月中歸  
雖然三尺無鋒刃  
百萬英靈屬指揮

過梅嶺

馬首經從庾嶺歸王師到處悉平夷  
擔頭不帶江南物

只插梅花三兩枝

姚樞

字公茂柳城人後遷洛陽金內翰宋九嘉識其有  
王佐略楊惟中乃與之偕覲太宗歲乙未南伐詔  
樞從惟中即軍中求儒道釋醫卜者拔德安得名  
儒趙復辛丑賜金符為燕京行臺郎中時伊喇沃  
濟行臺惟事貨賂每分及樞樞一切拒絕因棄官  
攜家來輝州作家廟別為室奉孔子及宋諸大儒  
像刊六經惠學者若將終身時許衡在魏至輝就  
學既而盡室依樞以居世祖在潛邸遣使召樞至  
大喜待以賓禮詢及治道樞為書數千言上之世  
祖奇其才動必召問世祖即位拜太子太師改大  
司農四年拜中書左丞十年拜昭文館大學士詳  
定禮儀十三年轉翰林學士承旨又四年卒諡曰

文獻從子燧官亦  
至承旨卒諡曰文

華不注行

崑崙山巔半峰碧海風吹落猶帶濕意氣不欲隨羣山  
獨倚青空迴然立平地拔起驚孱顏劍稜勁插青雲間  
濟南名泉七十二會為一水來浸山我來方作鯨川遊  
玉臺公子邀同舟君山浮嵐洞庭晚小孤滴翠清江秋  
酒酣興極烟霏昏魚龍慘澹回山根少陵不來謫仙死  
舉杯更欲招其魂魄今不來天亦老元氣崔嵬山自好

超超絕頂來長風注目東溟望蓬島

懷來醉歌

燕姬蟠頭面如玉一撒青金腰線綠當門舉酒喚客嘗  
俊入雙眸聳秋鶻白雲亂卷鑷鐵文蠟香一噴紅染唇  
據鞍側鞚半淋鬣春風滿面不肯嗔繫馬門前折殘柳  
玉液和林送官酒二十五絃妝百寶一片冰泉落纖手  
須臾高歌半酡顏貂裘護盡不覺寒誰道雪花大如席  
舉鞭已過千銀山

被顧問題張萱畫明皇擊梧按樂圖

阿萱五季名畫師  
尤工粉墨含春姿  
君王遊蕩墮聲色  
不知聲色傾人國  
開元無逸致  
太平天寶奢  
風生五兵偃  
月堂高幽薊遠  
潛謀不入芙蓉苑  
咸陽行色馬嵬塵  
畫筆雖工恐未真  
四海蒼生半魚肉  
歸來豈為香囊哭  
一日重開日月光  
黃金卻鑄郭汾陽

張弘範

字仲疇張柔第九子善馬槊幼從學郝伯常能為詩歌年二十代兄攝順天總管事吏民服其明決

中統初授御用局總管改行軍總管從親王噶必齊討李壇於濟南出奇制勝柔聞之曰真吾子也至元六年括諸道兵圍宋襄陽弘範佩金虎符為益都諸路行軍萬戶建言取襄陽以兵千人城萬山八年築一字城逼襄陽遂拔之十一年丞相巴延伐宋弘範為前鋒破賈似道於蕪湖長驅至建康請旨進師十二年破宋將張世傑水軍於焦山改亳州萬戶由海道會巴延進次臨安入城取宋稱臣降表以聞十五年授蒙古漢軍都元帥將水陸軍二萬分道南征獲宋丞相文天祥於五坡嶺天祥不屈待以賓禮獲禮部侍郎鄧光薦命子珪師事之十六年正月由潮陽港發舶入海次崖山宋亡紀功而還入朝慰勞甚厚未幾以瘴疾卒年四十三諡獻武○按張柔本金國大臣世食厚祿而甘心降元為士論所不齒幸弘範稍識理義敬禮忠良差勝其父云



攜妓泛舟遇雨

醉漾扁舟去歡生儘擢遲舞回風過處歌罷雨來時  
鳳竿傳瓊液驚萬膾玉絲池塘烟樹外一一畫中詩

遠烟

慘蕩微風外氤氲老樹頭乍驚香霧薄遙認斷雲浮  
日落山腰暮雨晴天際秋清明藏不得一片晉家羞

雛燕

羽為香潤態含癡睡足雲堦力尚微喚母但能啾唧語

戀巢猶倦往來飛熏風庭院簾初捲落日池臺人乍歸  
白鳳赤龍渾異事爭如隨分着烏衣

燭淚

惜別終宵話不休煌煌燈燭照離愁蠟花本是無情物  
持向人前也淚流

劉秉忠

字仲晦因從釋氏又名子聰其先瑞州人也曾大  
父仕金為邢州節度副使因家焉秉忠生而秀異  
志氣英爽不羈八歲入學日誦數百言十七為邢  
臺節度使府令史以養其親居常鬱鬱不樂一日

棄去隱武安山中久之天寧虛照禪師遣徒招致  
為僧以其工文詞使掌書記後遊雲中世祖在潛  
邸海雲禪師被召過雲中聞其博學多才藝邀與  
俱行既入見應對稱旨屢承顧問秉忠尤精易數  
凡三式六壬遁甲之屬無不洞達入微論天下事  
如指諸掌世祖大愛之海雲南還秉忠獨留藩邸  
癸丑從征大理明年征雲南每贊以好生去殺故  
城克之日不妄戮一人及伐宋所至全活不可勝  
計世祖即位秉忠猶不改舊服時人但以聰書記  
呼之至元元年帝覽翰林學士承旨王鶚奏言即  
日拜光祿大夫位太保參預中書省事詔以實默  
之女妻之賜第奉先坊寵任愈隆卒年五十九贈  
太傅封趙國公諡  
文貞有集十卷

有懷

雨過幽庭長綠苔東風時為掃塵埃無人曾見春來處  
門外桃花只自開


按秉忠尤工小詞其乾荷葉曲云乾荷葉色蒼蒼老  
柄風搖蕩減了清香越添黃都因昨夜一場霜寂寞  
秋江上又弔宋行宮云南高峰北高峰慘淡烟霞洞  
宋高宗一場空吳山依舊酒旗風兩度江南夢

劉秉志

太保弟也亦  
能詩附見

白雲樓

旌旗嫋嫋入隨州江漲祥烟散復收  
黃耳不來家信遠西風腸斷白雲樓



宋元詩會卷六十七

欽定四庫全書

集部  
宋元詩會卷六十八

詳校官中書<sub>臣</sub>陸 湘

主事銜<sub>臣</sub>徐以坤覆勘

總校官知縣<sub>臣</sub>繆 琪

校對官中書<sub>臣</sub>田尹衡

謄錄監生<sub>臣</sub>俞 鳳

欽定四庫全書

宋元詩會卷六十八

兵部主事陳焯編

趙復

字仁甫德安人元太宗乙未歲命太子科綽帥師伐宋德安以嘗逆戰其民盡被俘戮時姚樞奉詔即軍中求儒道釋及醫卜之士凡儒生挂俘籍者輒脫之以歸復在其中以九族俱殘不欲北樞知其為奇士留帳中夜逸行及水際將投身焉樞躡挽之多方曉譬謂徒死無益身存則先祀可延隨吾而北當保其無他復勉從之先是南北道絕載籍久不通自復至燕始取所記程朱諸撰著盡

錄付樞從復學者浸廣其教日益有聞世祖在潛邸嘗召見諮以伐宋事對曰宋吾父母國也未有導他人伐吾父母者世祖義之因不彊之仕楊惟中聞復論深嗜其學與樞謀建太極書院請復講授其中復作傳道圖別著伊洛發揮標其宗旨學者稱之曰江漢先生

覃懷春日

江南江北半浮生踪跡居然水上萍竹雞啼罷山雨黑

蠶子生時桑柘青

按楊元耶姚諸公皆起家中都以入元初自當為元詩眉目而是卷

首江漢容城兩先生  
蓋於義例各有取焉

劉因



字夢吉保定容城人世為儒家父述年四十無子  
夢神人馬載一兒至其家曰善養之既覺而因生  
乃名曰駟字夢驥後改名及字云因天資絕人三  
歲識書日記千百言過目不忘甫弱冠才器超邁  
作希聖解初為經學究訓詁之說輒嘆曰聖人精  
義殆不止此及得周程張邵朱呂之書一見能發  
其微曰我固謂當有是也因性不苟合家居教授  
師道尊嚴雖甚貧非其義一介不取公卿聞名往  
謁因多遜避或以為傲弗惜也至元十九年以布  
呼密薦擢承德郎右贊善大夫未幾念母疾辭歸  
明年丁內艱二十八年用集賢學士再徵以疾固  
辭且上書宰相詞意哀婉帝聞之曰豈古所謂不  
召之臣歟年四十五卒贈翰林學士諡文靖所著  
有四書精要三十卷文集十餘卷詩五卷號丁亥  
集

燕平學僊臺

碣石際海隅西南奄全燕中有學僊臺燕平欲昇天燕  
平骨已朽遺臺猶相傳雖復生青松歲久摧為烟極目  
望海波不見三山巔三山巨鰲簪山人蟣蝨然使無不  
足論信有亦可憐大塊與洪爐金石難久堅天地會有  
盡何物為神僊空山無笙鶴落日下饑鳶今古非一臺  
浩歎秋風前

黃金臺

燕山不改色易水無新聲誰知數尺臺中有萬古情區  
區後世人猶愛黃金名黃金亦何物能為賢重輕德輝  
照九仞鳳鳥才一鳴伊誰腐鼠棄坐見饑鳶爭周道日  
東漸二老皆西行養民以致賢王業自此成黃金與山  
平不救兵縱橫落日下荒臺山水有餘清

張燕公讀書堂

陰壁下寒泉陽崖隱深洞想像張幽州當年此絃誦選  
情納方寸灝露驚宵夢既有真積功豈無致時用不然

起絕學猶當垂後統濟濟唐開元儒臣相伯仲文雖數  
燕許名不並姚宋遂令百世下烟霞抱餘痛尋幽縱步  
貪懷古清歌送緬思百鹿翁眼中見連棟茲山有道氣  
會遇或天縱聊以永今朝白雲不可種

種松

萬牛來丘山大厦高崔嵬當年誰辛苦遺此千歲材手  
持百松子與之俱傾頽殷勤囑造物為護荒山隈今來  
見毫末喜溢蒼烟堆十年望根立百年排風雷自此千

萬歲再見明堂開東家十年計戢戢千頭哉豈不早有  
望求此良悠哉

和詠二疏

委質義有歸乞骸老當去豈無戀闕心難忘首丘趣在  
禮此常典末世成高舉漢庭多公卿圖畫兩疏傳至今  
秦中吟感嘆東門路目覩霍將軍功高擅恩顧一朝履  
危機千載損英譽仲翁幸及年安肯嬰世務聖主賜臣  
金奉養行厥素造物供我老餘齡今自悟田園付子孫

身後復無慮神交冥漠中樂境尚森著

和詠三良

江山錯如繡死與敝屣遺安用親愛人共此丘土微秦  
人多尚氣宜無兒女私乃亦如當塗區區戀衣帷因傷  
秦政惡三嘆王綱虧殉人已可誅而况收良歸坐令百  
夫特含恨與世違祇應墓前栢直幹千年希遙知作俑  
戒為感詩人悲重吟黃鳥章淚下霑人衣

燕歌行

薊門來悲風易水生寒波雲物改何色遊子唱燕歌燕  
歌在何處鬱鬱西山阿武陽燕下都歲晚獨經過青丘  
遙相連風雨墮嵯峨七十齊郡邑百二秦山河學術有  
管樂道義無丘軻蚩蚩魚肉民誰與休干戈

遊雲水庵

乘春奮幽潛觀化登丘山哀淙聞遠壑息駕思雲關壑  
石密松桂結屋深茅管生烟紛漠漠激流散潺潺山石  
浮壽色澗木榮歡顏覽物有真意撫節驚循環悠然千

載情儼若盤石間眷焉欲晤語古人何當還

泛舟西溪

萬山倒滄浪一葉凌嵯峨嵯峨為飛舞翠影如婆娑輕  
陰散雨足淨綠生圓波人間碧海幻老眼青銅磨風雲  
幾千古辦此雨中蓑溪南有幽人鼓櫂前山阿烟深渺  
無處月色浮松蘿

和九日閒居

深居忘晦朔好事惟侯生偶因菊酒至喜聞佳節名香



醪泛寥廓醉境還空明青天凜危帽浩蕩來秋聲緬懷  
長沙孫生氣流千齡乾坤一東籬南山久亦傾回看聲  
利徒僅比秋花榮撫時感遺事可見萬古情

孤雲

孤雲生幾時冉冉何所適豈無崑華高路遠嗟獨力徘  
徊天中央明月為顏色下有幽棲士歲晏倚青壁朝飲  
澗下泉暮拂松間石相對澹忘情倒影寒潭碧

遊源泉

叢祠鬱蒼翠萬木藏清幽冷然石上足不逐蒼波流長  
風索我御欲舉仍遲留白雲何山來相對亦悠悠

玉溪精廬

居然山四顧危檻俯晴春川氣生不極翠潤流衣巾林  
陰起薄暮酒色生微醺歌聲忽落谷驚歸欲飛雲

白蓮

冰華謝風塵素質更深靜灝露凝幽香皎月散清景誰  
並絕世姿澹然水中影青房生苦心秋風逼涼冷安得

同愛人共此良夜永

漱霞巖

丹霞凌日觀餘津浩難收  
蒼涼蘇病骨醉暈浮巖幽  
萬象春意融頽然得歸休  
擾擾路傍子無勞歌遠遊

經古城

我行常山尾高城下  
吾前按轡覽形勢依依見全燕  
易水開前襟飛狐連右肩  
遙想豪傑場撫已增慨然  
薪人過我傍一笑如相憐  
指城前問余考古今幾年沈思未

及答行歌入蒼煙

月下獨酌

佳月靜可飲一天明水寒餘光泛不極徘徊尊俎間但  
覺涼露下不知清夜闌醉眠吾有興君當下西山

飛泉亭

崦嵫多露草秋空把飛泉胸中玉芙蓉滿意清冷淵火  
食因煩鬱下顧心茫然何當分一杯灑落齊州烟

六華峰

入山採靈芝濯足東澗濱白雲不可招丹霞有餘津長  
風忽絕頂悠哉凌翠氛舉手問浮世此子何今人

蜀葵

蜀葵落秋子已能成小叢如何同枝花隱隱纔含紅一  
氣有先後萬物誰窮通伊誰歎遲暮來此樽酒同

翟節婦

昔金源氏之南遷也河朔土崩天理蕩然西山乃有  
婦人翟氏年二十餘其夫從軍死於所事婦匍匐數

百里以其尸歸負土而葬之遂自經墓側鄰里救而復蘇始終一節今年八十餘矣予為作詩

兵塵浩然際烈士難自全婦人無九首志欲不二天燕  
山翟氏女既嫁夫防邊一朝聞死事健婦增慨然生有  
如此夫早寡非所憐求尸白刃中負土家山前事去哀  
益深義盡身可捐無兒欲何為所依惟黃泉鄉鄰救引  
決烈日丹衷縣誰倣節孝翁重表灘陽賢

桃源行

六王埽地阿房起桃源與秦分一水小國寡民君所憐  
賦役多慙負天子天家正朔不得知手種桃枝辨四時  
遺風百世尚不泯俗無君長人熙熙漁舟載入人間世  
却悔桃花露踪跡曾聞父老說秦彊不信而今解亡國  
畫圖曾識武陵溪飛鴻滅沒天之西但恨于今又千載  
不聞再有漁人迷

明妃曲

初聞丹青寫明眸明妃私喜六宮羞再聞北使選絕色

六宮無慮明妃愁妾身只有愁可必萬里今從漢宮出  
悔不別君未識時免使君心憐玉質君心有愛在遠方  
寧恨妾身辭椒房飛鴻不解琵琶語祇帶離愁歸故鄉

續十二辰詩

饑鳶嚇鼠驚不起牛背高眠有如此江山虎踞千里來  
才辦荊州兔穴爾魚龍入海浩無涯幻境等是杯中蛇  
馬耳秋風去無跡羊腸蜀道早還家何必高門沐猴舞  
豚穽雞栖皆樂土柴門狗吠報隣翁約買神猪謝春雨



清江曲

清江芙蕖玉可憐  
岸花汀草自年年  
年來鴻去燕不相識  
曉露無聲香暗泣  
江樓縹緲如花人  
望欲見之不可親  
無限晴雲錦樹新  
愁眉只向遙山顰  
遙山一千里長在  
愁眉底鏡裏繁華  
過眼空遙山鑄向  
青銅中遙山遙復  
遙芙蓉霜早凋  
明日愁眉為誰掃  
月白江清天未曉

宋徽宗賜周準人馬圖

筆底金鞍自蕭爽  
誰云不博降王長  
汴梁門外若雲屯

畫本相看應自賞十載青衣夢故都經營慘淡欲何如  
只除金粟呼風裊曾見昭陵鐵騎趨

宋高宗題李唐秋江圖

秋江吞天雲拍水濤借西風挾不起斷雲分雨入江村  
回首龍沙幾千里澹菴老筆搖江聲髣髴阿唐慘淡情  
千秋萬古青山恨不見歸舟一葉橫

明河秋夕圖

明河澹澹縱復橫行雲悠悠度疎星鳳媒不來烏夜驚

瓊枝玉佩遲所託  
畫中隱隱有機聲  
秋來秋去今猶古  
此恨不隨天宇青  
崑崙西頭風浪平  
辦我一舟蓮葉輕  
浩歌中流擊明月  
九原喚起嚴君平  
人間此水何時清

明遠堂賞蓮醉賦

畫堂香遠凝清秋  
宛如坐我南湖舟  
主人愛客情亦重  
謂我無語花應羞  
荷香繞筆詩自健  
滿紙已覺清江流  
平生老氣回萬牛  
為君傾倒元龍樓  
舉杯喚起謝安石  
我醉不省蒼生憂

除夕

百歲三分一初心漫慨然空囊難避節青鏡不留年靜  
閑無窮世閒觀已定天履端思後月四鼓未成眠

登武陽

朝遊樊子館晚上武陽城潮接滄溟近山從碣石生斷  
虹雲淡白返照雨疎明且莫悲吟發樵歌已愴情

書堂旅夜

淹留已半載去住意何深月色一千里愁人方寸心秋

聲助搖落生理歎浮沈松桂清霜滿哀歌動故林

秋望

病骨秋偏早單衣露亦寒微雲生水際暝色起林端地  
迴月遲下樓高山易殘輕風吹欲舉醉袖拂層巒

重渡滹沱

遙臨滹水岸回望土門關秋色巉巖上川形拱抱間分  
疆人自隘設險地誰慳欲問前朝渡江鷗故意閒

寒夜

肝膽了無寐襟懷誰與同  
更長頭可白燭暗火逾紅  
硯滴水生癭星流氣吐虹  
林鴉先我起鳴噪竟何功

寄子東太守

一夕西山客頻年往事非  
黃塵驚我老青眼似君稀  
別浦秋容靜離亭草色微  
殷勤重寄謝後會不應違

登雄州城樓

古戍寒雲接渺茫  
故鄉遊子動悲涼  
江山自古有佳客  
烟雨為誰留太行  
野色分將愁外綠  
物華呈出夜來霜

海門何處秋聲急極目滄波空夕陽

新晴

小雨新晴草色蘇  
家園生理未全疎  
埋盆欲學魚千里  
試地先栽芋一區  
時與老農談稼穡  
不因閒客罷琴書  
乾坤妙處無人會  
卧看牆陰雀哺雛

夢鎮州潭園

昨夜分明是鎮州  
溪潭先子舊曾遊  
魂來千里太行碧  
夢覺滿庭烟水秋  
古淡園林無限意  
登臨今昔幾人愁

當年猿鶴應無恙  
爭信書郎漫白頭

自適

久矣黃塵絕往還  
惟餘風月到柴關  
清霜烈日從渠畏  
野鶴孤雲迥自閒  
天上銀河連碧落  
人間秋色對南山  
高吟大醉堯夫老  
只有豪誇不易刪

老崖

老崖陰陰雲樹清  
柴門寂寂綠苔生  
空明萬象隨月出  
水墨四山因雨成  
千古心期破茅屋  
百年人事短燈檠



道民不是悲秋客  
聽盡疎蛩夜夜聲

夏日即事

迂疎爭笑近清狂  
多病筋骸可預防  
久之園蔬因種藥  
不留窗紙為抄方  
閒從鳥雀分晴晝  
靜與蟬蛩共晚涼  
莫道幽人好標致  
陶廬原自有羲皇

夜雨

夢覺呼童問幾更  
未鷹先作案頭鳴  
山深六月有秋意  
夜靜滿城惟雨聲  
四海虛名此身愧  
百年浮世寸心驚

誰教簷溜如愁思欲斷還連直到明

過徐橋

老岸危欄曙色分只疑身是入山雲十年往事不回顧  
百里清泉如可聞人世誰教有長路坤靈終亦化塵氛  
興亡更遣陂塘在幾欲悲秋酒正醺

秋郊

行過青林徑欲還誰家茅屋在林間雲初湧出半含雨  
風漸吹開微露山世味嘗來知懶貴韶華老盡覺秋閒

天教勝境為詩敵未許幽人穩閉關

反垂柳短吟

偃蹇高松雪漫飛最憐憔悴綠楊枝青絲曾識鶯聲軟  
黃葉俄驚馬足遲有分只偷春色早無心要結歲寒知  
不應再得東風力更與行人管別離

遂城道中

鐵城秋色接西垣遠客還鄉易斷魂霸業可憐燕太子  
戰樓誰弔漢公孫冷烟衰草千家塚流水斜陽一點村

慰眼西風猶有物太行依舊壓中原

石螺

碧筩和露捲晴霞錦浪隨鯨落晚沙風趁歌聲來弄葉  
酒知人意要浮花胸中壁立三峰玉醉裏神遊太一家  
明日清霜看紅翠人生容易鬢成華

遠山筆架得痕字

何物能支筆萬鈞案頭依約遠山痕燈橫烟影隱猶見  
秋入霜毫勢欲吞掌上三峰看太華人間一髮是中原

秘書未免從高閣不向林泉怨少恩

秋蓮子

瘦影亭亭不自容  
淡香杳杳欲誰通  
不堪翠減紅銷際  
更在清江冷月中  
擬欲青房全晚節  
那知白露已秋風  
盛衰老眼依然在  
莫放扁舟酒易空

村居雜興

鄰翁走相報  
隔窗呼我起  
數日不見山  
今朝翠如洗

白樂天琵琶行圖

冀馬嘶寒風逐臣念鄉國江浦聞哀絃長吟望南北

臘盡

小雪初晴臘盡時無窮梅柳怨開遲人間不覺春日早  
只有吾家布被知

銅雀瓦硯

諸侯負漢已堪憐直筆何為亦魏編却愛曹瞞臺上瓦  
至今猶屬建安年

新居

雪擁閒門儘未除小齋人道似禪居年來日歷無多事  
只有求方與借書

山家

馬蹄踏水亂明霞醉袖迎風受落花怪見溪童出門望  
鵲聲先我到山家

宋理宗南樓風月橫披一首

試聽陰山勅勒歌朔風悲壯動山河南樓烟月無多景  
緩步微吟奈爾何

# 安熙

字敬仲真定藁城人祖滔父松皆以學行淑其鄉人熙既承家學及聞保定劉因之名心嚮慕焉藁城距因所居不十舍因亦聞熙力於為學深許與之熙方造門而因已歿乃從因門人烏叔備聞其緒論一以朱氏為宗自是益從事下學之功平實切密簡覲和易四方來學者多所成就遭時承平不屑仕進家居教授垂四十年歿後鄉人為立祠於藁城之西莞鎮其門人蘇天爵輯熙遺文而虞集為序焉

## 擬古

鬱鬱巖下栢青青水中蒲巖前有幽人壯歲常獨居獨



居亦何為不羨春華數十年  
掩闕卧門庭盡荒蕪美人  
殊不來日夕聽軒車

人生有定分所貴能樂天  
自輕失所守欲進安敢前  
思君重思君此情誰與宣  
舉頭見明月顧影徒自憐  
終當謝塵世洗心聞澗泉

書事

野性原孤潔無朋獨嘯歌  
業荒聞道淺靜久閱人多  
靈鳳寧棲枳冥鴻本避羅  
南遊有高興何處是滄波

次韻答友見贈

高山流水趣何深，萬古千秋一素琴。  
白石清泉成雅志，光風霽月負初心。  
伏龍應羨雲生谷，獨鶴不驚鴉滿林。  
無用野夫宜揣分，商家元自有甘霖。

杏花初開小酌

生紅和露滴胭脂，又到芳春寂寞時。  
便擬提壺花下醉，却愁羞殺背陽枝。

杖藜吟繞去還來，收拾春光入酒杯。  
自是風花要題品，

等閒蜂蝶莫相催

龍仁夫

字觀復號麟洲永新人以學行稱與同郡劉詵劉岳申齊名而仁夫之文尤奇逸流麗所著周易多發先儒所未及至元間用薦者授江浙儒學副提舉不就詩文多散失惟兩絕句流傳至今蓋其命題託興足見高風固非求工於詞調也

琵琶亭

老大蛾眉負所天忍將離怨付哀絃江心正好看明月

又抱琵琶過別船

應小玉帶索詩

菡萏池邊風滿衣  
木樨亭下雨霏霏  
老夫記得坡仙語  
病體難禁玉帶圍

劉會孟

字辰翁別號須谿廬陵人於唐宋諸大家詩皆有  
批點又評世說新語皆為士林所稱而同時張孟  
浩贈以詩云首陽餓夫甘一死叩馬何曾罪辛巳  
淵明頭上漉酒巾義熙以後為全人蓋宋亡之後  
須谿竟不出仕也

文姬歸漢圖

鵲巢覆絕孔文舉錦衾裏葬楊德祖銅雀春風歌舞長  
獨復淒然故人女故人有女勝無兒滿腹興亡身屬誰  
琴燒笛折箏灰冷閭巷草深歸鶴饑美人用事單于國  
細馬馱金為向北曾從過雁借書看又託枯魚寄聲得  
塞笳日聽心自哀天遣前朝漢使來穹廬抱子送于野  
欲去欲住真難哉大兒牽衣小兒乳割乳分攜淚如雨  
馬駛兒啼漸不聞腸斷一如初遇關畫圖巧盡但無聲不  
畫賢王子母情踟躕拳跼各有態未必日暮分馳能天

長地久何終極事已不堪回首覓草無南北是青青雲  
有朝昏長幕幕琵琶恨絕妬難消海上羝兒夢豈遙入  
見玉關天似錦歸從金馬曉當朝容儀憔悴餘雞骨記  
問荒唐存又歿衛郎去我墓何所魏史親人禮難越當  
時一女贖元身亂代流離更可聞天南地北有歸路四  
海九州無故人

春晴二首

江柳長天草色齊新晴何物不芳菲無因化作千蝴蝶

西蜀東吳款款歸

新燕池塘綠雨肥  
初晴未暖日光微  
角巾猶帶花梢濕

纔倚闌干見絮飛

李冶

字仁卿真定藥城人登金進士第辟知鈞州歲壬辰城潰治微服北渡流落忻崞間世祖在潛邸聞其賢遣使召之且曰素聞仁卿學優才膽久欲一見其勿他辭既至問河南居官者孰賢治惟以完顏仲德對又薦魏璠王鶚李獻卿蘭光庭等七人皆有用之才及世祖詢治道則曰立法度正紀綱而已上嘉納之晚家元氏買田封龍山下授徒講道及世祖即位復聘之不起至元二年再以學士

召引老病葺月輒去官歸卒於家年八十八所著有敬齋文集壁書藁削泛說古今難益古衍疑測

圓鏡海

等書

觀主人植槐

主人有佳樹移植庭之隅繁柯雖剪去不敢觸根株朝  
溉復夕灌乳井幾成枯諷誦角弓詩古人能起予愛樹  
尚如此愛士當何如

楊白花

帝家迷樓春晝長紫笙吹破百花香葡萄凝碧琥珀光



燕語鶯啼空斷腸  
枕帷紅淚灑瀟湘  
玉鏡臺前添午妝  
茜羅緩帶雙鴛鴦  
蝴蝶趁雪上釵梁  
千里萬里雲茫茫  
姑蘇臺

吳王宴罷歌臺晚  
斜日清江映欄檻  
臺上西施醉捧心  
江邊東越愁嘗膽  
鴟夷裹尸去不還  
麋鹿散迹遊其間  
秋深明月照高樹  
驚烏啼落丹楓寒  
功名獨羨陶朱子  
一葉扁舟弄雲水

瀟湘夜雨

遠寺孤舟墮渺茫雨聲一夜滿瀟湘黃陵渡口風波暗  
多少征人說故鄉

墨海棠

漢宮愁絕冷臙脂一醺劉郎兩鬢絲甲帳夜寒銀燭短  
六銖雲帔獨來時

胡長孺

字汲仲永康人家世通顯至長孺其學益大振九  
經諸史下逮百氏無不包羅而揆序之宋咸淳間  
從外舅官蜀舉蜀銓試第一名授迪功郎宋亡退  
棲永康至元二十五年詔下求賢有司強起之拜

集賢修撰改教授楊州移建昌轉寧海主簿擢兩  
浙都運鹽使司階將仕郎以病辭不赴隱杭之武  
林山以終長孺初師青田余學古學古師王夢松  
夢松亦青田人傳龍泉葉味道之學味道則朱元  
晦弟子也其淵源極正而涵養足以充之卒年七  
十五所著書有瓦缶編南昌集寧海漫抄顏樂齋  
稿行  
於世

題段郁文雪石

白雲飛來着石空  
翕霍變化生奇峰  
朝曦照耀舒復卷  
碧華忽擁玻璃宮  
秋潮初壯明于雪  
千雷動地吳山裂  
濤頭出海夕陽微  
百鍊青銅浮玉玦  
雲容濤勢偉且奇

乍出乍沒須臾時乾薦雪山白盈尺晴天萬里窺蛾眉  
似識詩翁作詩苦獨擁清妍照環堵河翻月落夜未央  
如虹光氣飛屋梁

許衡

字仲平懷之河內人家世為農父通避地河南以  
泰和九年九月生衡於新鄭縣幼有異質長嗜學  
如饑渴家貧無書從日者家手抄書疏義繼得王  
輔嗣易說夜思晝誦身體而力踐之轉魯留魏人  
見其有德稍稍信從居三年還懷從柳城姚樞得  
程朱遺書益大有得居蘇門與樞及竇默相講習  
凡喪祭嫁娶必徵於禮以倡其鄉人學者寢盛人  
有所遺一毫弗義弗受也甲寅世祖出王秦中以

姚樞為勸農使因召衡為京兆提學中統元年世祖即位召至京師時王文統以言利進為平章政事衡無意立朝授太子太保不拜改國子祭酒未幾謝病歸至元二年復召至京師命議事中書省衡力陳立國規模凡數千言帝皆嘉納四年移疾歸懷五年復召還六年命與太常卿徐世隆定朝儀併定官制俱稱旨亡何阿哈瑪特為中書平章政事勢傾朝野衡不附已薦為中書左丞欲中以法衡辭免從幸上京乃論列阿哈瑪特專權罔上諸事不報即日解機務歸後召為集賢大學士兼國子祭酒領太史院事至元十八年卒年七十三諡文正

## 訓子

干戈恣爛熳無人救時屯中原竟失鹿滄海變飛塵我

躬揣何能僅存亂後身遺芳藉祖德陰理出先人俯仰  
意油然而此樂誰與倫家無儋石儲心有天地春況對汝  
二子豈復知吾貧願汝學古人古道淳且真勿憚攻苦  
辛當思過乃親身在畎畝間不忘君與民功名戒乘捷  
以此書諸紳

有感 二首

嬌兒未成人痛苦不肯退憂傷動中懷慘慘心欲碎老  
妻情更惡中夜泣相對何如早還鄉山陽墳隴在平生

所願心展轉不得遂十年誤同遊回首只多愧病連肝  
肺深愁覺妻子累悠悠故鄉情滴滴眼中淚

歸興不可遏歸程待何時悠悠故鄉心一夕千里馳西  
風動霄漢惻惻令人悲況我多病身天涯久棲遲交遊  
義難忘豈忍輕別離重念丘隴遠嬌兒正愚癡因循死  
異邑後世將安遺所願經營日及此未全衰樹桑牆以  
下開畦水之湄既得舒困難且可為鉉基

別西山

大山如蹲龍小山如踞虎烟嵐鬱蒼翠遠近互吞吐我  
來蘇門居遨遊成樂土策杖望朝雲捲簾看暮雨佳意  
豁塵腥勝槩入談麈使我鬱陶消不覺勞瘵愈生平鄙  
吝心一洗出千古回首聲利人何殊坐圉圉遠役非素  
懷况兼跋涉苦吟鞭裊春風遲遲如去魯芳菲二三月  
追遊盛桃塢歸來願無違一樽相對舉

又一首

所愛林慮山不處要路津茲焉幾千古絕彼朝市塵我



來成素交淡淡日盆親形骸兩相忘誰主誰復賓充然  
樂我饑怡然棲我神朝光連暮色佳意含餘春心境一  
融會世味殊非真奕奕草木光熙熙禽鳥馴衆物欣有  
託吾廬行亦新

和吳行甫雨雹韻

青山偃蹇與世疎只將秀色供吾徒知君如我有山癖  
深探遠討吾不如金燈峰山詩千首挂鏡臺前一杯酒  
人間萬事盡浮雲故人曾為相思否雲邊鸞鳳玉鞭鳴

跛鼃蹯跚疊繭生天末碧雲凝遠思夕陽無語下西城

北門觀漲

雨水添新漲陂湖沒舊痕人迷堤口路船上樹頭村  
歲事知前誤秋耕未可論誰憐徭役苦天亦恡深恩

不寐

秋宵初感慨展轉不成眠老況青燈外羈愁白髮邊  
蹉跎嗟往事安穩憶歸年却起開門望霜清月滿天

別友人

良朋不易得此去復誰羣別酒無勞勸濃愁已自醺間  
闌花外鳥冷澹日邊雲莫唱陽關徹離聲忍更聞

趙氏南莊

曉起北窗涼清談戢羽觴入簾花氣重落地燕泥香夢  
裏青山小吟邊白日長秋風載書籍相對築茅堂

登東城

步屨上東城秋風晚更清亂雲隨日下荒草過堤平野  
迴寬凝佇詩成促後生何當常似此慰我病中情

遊北觀

扶杖古城荒飄然意可傷  
道宮烟鎖樹農舍雨頽牆  
捕吏翻疑寇平人却笑狂  
長吁空仰首天際正蒼蒼

喜晴

曙色開晴望春風吹客顏  
綠紆東去水青起北來山  
魏府方期往共城已夢還  
芳菲梅塢盛留醉竹花間

病中雜言 二首

磊落青山萬仞高  
虛崖絕險駭猿猱  
從誰得上巖龕住

免我從來俗事勞  
曉日烟霞明澗壑  
霽天霏靄散林皋  
休言只好寬凝佇  
滿地干戈學善逃

春來秋去客中情  
轉首光陰十歲經  
學苦煉成心下赤  
愁多消却鬢邊青  
眼前世事翻棋局  
夢裏家山憶畫屏  
何日歸同林下友  
笑談書史復忘形

題武郎中桃溪歸隱圖

門外鞦韆擺翠烟  
籬邊雞犬亦閒閒  
更教爛熳花千樹  
對着縈紆水一灣  
好景已憑摩詰畫  
他年重約長卿還

尋思此世人心別又愛功名又愛山

中秋不見月繼賓先生韻

撥去塵機得暫閒  
秋蟾思比去年看  
誰知黯黯陰雲合  
故作淒淒夜色寒  
好友不來誰酩酊  
詩人徒想自闌干  
世間萬事渾難定  
付與無心却較安

晚步西溪

拉友西溪往步聯  
溪邊佳景麗秋天  
日回林影蒼烟外  
風轉灘聲白鳥前  
迅走雙輪機磨巧  
連安獨木小橋偏

老年活計尋幽隱須擬為氓置一廛

宋元詩會卷六十八